

समे – 12:25

<><><><><><>

3 Phase Campagining

जम्मू कश्मीर च होआरदे विधानसभा चुनाएं दे त्रीए ते खीरले गेड लेई प्रचार जोरें शोरें पर ऐ। हर इक सियासी पार्टी दा मेदवार मतदाताएं गी अपने पक्ख च करने आस्तै पूर जोर कोशशां करा'रदा ऐ। पैहली अक्तूबर गी त्रीए गेड तैहत होने आले विधानसभा चुनाएं दरान 40 विधानसभा सीटें पर मतदान होग। आकाशवाणी जम्मू संवाददाता दी रिपोर्ट मूजब बक्ख-बक्ख सियासी पार्टिएं दे नेता मतदाताएं गी अपने पक्ख च करने लेई रैलियां करा'रदे न। भारतीय जनता पार्टी दे वरिष्ठ नेता ते केन्द्रीय गृह मंत्री अमित शाह होरें कठुआ ते उधमपुर च चार रैलिएं गी संबोधत कीता। प्रधानमंत्री नरेन्द्र मोदी होर कल जम्मू दा दौरा लांगन ते इक बड्डी रैली गी संबोधत करगंन। ओह पार्टी मेदवार दे समर्थन च रैलियां करा'रदे न। कांग्रेस नेता राहुल गांधी होरें कल जम्मू च पार्टी कारजकर्ताएं कन्नै बैठक लाई। पीडीपी प्रमुख महबूबा मुफ्ती होरें अपनी पार्टी दे मेदवारें दे समर्थन च रोड शौ कीता। नेशनल कान्फ्रेंस हुन जम्मू खित्ते पर ध्यान देआ'रदी ऐ। विधानसभा चुनाएं दा त्रिया ते अखीरला गेड कड़ा गै निर्णायक होने आला ऐ इस गेड च जम्मू खित्ते दी 24 ते कश्मीर खित्ते दी 16 सीटे लेई वोट पाए जाने न। जम्मू जिले दे 11 विधासभा हल्के च बी इस गेड च मतदान होग। जम्मू जिले दी 11 कठुआ दी 6, उधमपुर दी 4 ते साम्बा जिले दी त्रै विधाससभा सीटें लेई इस गेड तैहत मतदान होना ऐ। एह मतदान पैहली अक्तूबर गी होना ऐ।

<><><><><><>

PM-Jammu Rally

जम्मू कश्मीर च त्रीए ते खीरले गेड दे विधानसभा चुनाएं गी दिक्खदे होई प्रधानमंत्री नरेन्द्र मोदी होर कल जम्मू दा दौरा लांगन ते मौलाना आजाद स्टेडियम च इक बड्डी रैली गी संबोधत करगंन। इस रैली लेई तैआरियां जोरें शोरें कन्नै जारी ऐ। मौलाना आजाद स्टेडियम गी मोदी हुंदी रैली लेई चुनेआ गेआ ऐ, प्रधानमंत्री हुंदी रैली गी दिक्खदे होई सुरक्षा दे बी

पुख्ता बंदोबस्ते कीते गे न। भारतीय जनता पार्टी दे केंई सारे स्टार प्रचारक रैलियां करा'रदे न। ता जे मतदाताएं गी अपने पक्ख च कीता जाई सकै। प्रधानमंत्री हुन्दी एह रैली त्रिए ते खीरले गेड दे चुना प्रचार च पार्टी गी होर बल देग। कांग्रेस दे वरिष्ठ नेता ते एआईसीसी दे जम्मू कश्मीर प्रभारी होरें दस्सेआ ऐ जे राहुल गांधी हुंदा अज्ज रामगढ़ ते खौड़ च चुनावी रैली करने दा कार्यक्रम ऐ। पार्टी नेता प्रियंका गांधी होर 28 सितम्बर गी रैलियां करगंन।

<><><><><><>

3rd Phase Voting

जम्मू जिले दे 11 विधानसभा हल्के च त्रीए गेड तैहत मतदान होना ऐ। 12 लक्ख थ्वां मतदाता वोट पाने दे अपने अधिकार दा इस्तेमाल कर'न। जम्मू दे जिनें 11 विधानसभा हल्के च वोट पाए जागंन, उंदे च बिश्नाह, सुचेतगढ़, बाहु, जम्मू ईस्ट, नगरोटा, जम्मू वेस्ट, जम्मू नार्थ, मढ़, अखनूर ते छम्ब शामिल न। कुल 12 लक्ख 977 मतदाता न जिंदे च 6 लक्ख 19 ज्हार 66 मर्द, 5 लक्ख 81 ज्हार 887 महिलां ते 24 थर्ड जेंडर मतदाता न। आर.एस. पुरा-जम्मू साउथ च सब्बनें थ्वां बद्द 1 लक्ख 30 ज्हार 107 पंजीकृत मतदाता न। इत्थे 67 ज्हार 322 मर्द, 62 ज्हार 782 महिलां ते 3 थर्ड जेंडर मतदाता न। मढ़ हल्के च सब्बनें थ्वां घट्ट मतदाता न। इत्थे कुल 93 ज्हार 598 मतदाता न जिंदे चा 48 ज्हार 640 मर्द, 44 ज्हार 957 महिला ते इक्क थर्ड जेंडर मतदाता ऐ। चुनाएं गी रमानदारी आले ढंग्गै सिर करोआने लेई भारतीय चुनां आयोग आस्सेया 1 ज्हार 494 मतदान केंद्र बनाए गेदे न जिंदे चा 609 शैहरी इलाके च ते 885 ग्रामीण इलाके च कायम कीते गए न। मतदाताएं दी हिस्सेदारी गी बदाने लेई पीडब्ल्यूडी पोलिंग बूथ, महिलाएं लेई पिक पोलिंग स्टेशन, युवाएं आस्सेया संचालित मतदान केंद्र, ग्रीन पोलिंग स्टेशन कायम कीते गए न। त्रीए गेड च जिले दे सारे हल्के च मलाइए कुल 47 ज्हार 963 पैहली बारी मतदान करने आहले मतदाता न। छम्ब च सब्बनें थ्मां बद्द 5 हजार 6 सौ 47 first time voters, जम्मू west च सब्बनें थ्मां घट्ट 2 हजार 8 सौ इक नेह मतदाता न। जम्मू दे वुजुर्ग मतदाताएं दी गिनतरी कुल मतदाताएं दी गिनतरी दी 18 प्रतिशत ऐ. 2 लक्ख 15 हजार 3 सौ 38 मतदाता 60 बरे थ्वा ते एदी सोयां मती उमरी दे न। 100 थ्मां 109 ब'रे दे 404 मतदाता, 110- 119 ब'रे दे 29 मतदाता, 120 थ्मां बद्द दे 6 मतदाता न। त्रीए गेड तैहत मतदान पैहली अक्तूबर गी होगं मतदाताएं गी जागरूक करने लेई कई सारे कार्यक्रम चलाए जा'रदे न।

<><><><><><>

Jammu School Closure

मतदाताएं दी शमूलियत गी बधाने दे मकसद कन्ने जम्मू दे जिला मैजिस्ट्रेट सचिन कुमार वैश्य होरें जम्मू जिले दे सारे शैक्षणिक संस्थानें गी 30 सितम्बर गी बंद रखने दा हुक्म जारी कीता ऐ। एह फैसला युवा मतदाताएं दा ते उंदे अभिभावकें दे लोकतांत्रिक हक्कै गी दिक्खदे होई कीता गेआ ऐ तां जे एह लोक बिजन कुसै परेशानी दे मतदान करी सकन।

<><><><><><>

NIA Raids

राश्ट्रीय जांच अजेंसी आस्सेआ अज्ज रियासी ते राजौरी जिलें गी केई सारे थाहरें पर छापेमारी कीती जा'रदी ऐ। एह छापेमारी रियासी जिले च शिव खौड़ी मंदर थमां वापस परतोआ'रदे श्रद्धालुएं दी बस पर होए दे आतंकवादी हमले दी पछोकडै च ऐ। 9 जून गी होए दे इस आतंकवादी हमले च 9 लोक जिंदे च 7 श्रद्धालु बाह्रा थमां दे मारे गे ते 41 घायल होए हे। एह बस शिव खौड़ी थमां कटरा परतोआ'रदी ही। 17 जून गी गृह मंत्रालय नै एह मामला एनआईए गी सौंपी दित्ता हा। राजौरी थमां इक व्यक्ति गी जिने आतंकवादिएं गी रूट्टी, रौहने-बौहने ते होर दूई मदद उपलब्ध करोआई ही, गी गिरफ्तार करी लैता गेआ हा। छापेमारी जारी ऐ ते होर ब्योरे गी बलगेआ जा'रदा ऐ।

<><><><><><>